



Fundasaun Mahein (FM), 25 Agustu 2017

Komunikadu Imprensa

## **Situasaun Sira Depois Eleisaun: “Entre Estado do Homen e Estado da Lei”**

(Iha Ambitu Funsionamentu IV Lejislatura no Formasaun VII Governu Konstitusional)

Rezultadu Eleisaun Parlamentar 22 Jullu 2017 hatudu ona partidu polítiku lima maka hakat liu bareira 4% ka asentun iha Parlamentu Nasional ba periodu 2017-2022 maka partidu FRETILIN (29,7%), CNRT (29,5%), PLP (10,6%), PD (9,8%) no KHUNTO (6,4%) ne'ebé hetan ona validasaun liu husi Akordaun Tribunal Rekursu nian no ofisialmente fo sai iha loron 1 Agustu 2017. Maske rezultadu ofisial fo sai ona maibe to'o agora Deputadu sira IV Lejislatura seidauk simu *posse*. Mandatu III Lejislatura kontinua funsiona ho Deliberasaun Plenaria husi Deputadu sira III Lejislatura nian. Ironiku liu tan Governu funsiona ho Governu de Jestaun ida. Situasaun ida ne'e mosu reazen oin-oin husi polítiku sira no sosiedade tomak kona-bá adiamentu *posse* ba IV Lejislatura no formasaun VII Governu ne'ebé iha inserteza nia laran.

Komforme Prezidente Parlamentu Nasional III Lejislatura nian Aderito Hugo hato'o ba media katak mandatu III Lejislatura estende ho Deliberasaun Parlamentu Nasional nian hahu loron 1 Agustu 2017. Estende mandatu III Lejislatura tamba impaktu husi mudansa kalendariu eleisaun, mandatu hanaruk. Razaun ida seluk katak pedidu husi partidu FRETILIN nian hodi adia *posse* ba Deputadu sira IV Lejislatura nian.

Mandatu ba Deputadu sira III Lejislatura nia ramata ona iha loron 31 Jullu 2017 tuir sirkulu mandatu nian 30 Jullu 2012 to'o 30 Jullu 2017. Portantu tuir Konstitusaun artigu 93 n.º 4 katak nia mandantu tinan lima deit. Nune'e mos Rejimentu Parlamentu Nasional nian artigu 41 n.º 1 hatete primeira reuniaun plenaria Parlamentu nian depois eleisaun no ajensa ona husi Prezidente Parlamentu sesante iha prazu masimu loran sanolu-resin lima konta husi data publikasaun ofisial rezulta. Rezultadu eleisaun halo ona validasaun liu husi Tribunal Rekursu nia Akordaun no ofisialmente fo sai ona iha loron 1 Agustu 2017. Maibe Deputadu sira III Lejislatura extende nia mandatu ho Deliberasaun Plenaria nian no la'o to'o agora hodi hein *posse* ba Deputadu sira IV Lejislatura nian. Extensaun ida ne'e taka dalan tiha ba Deputadu sira eleitu ba IV Lejislatura nian.

Tamba ne'e Fundasaun Mahein (FM) konsidera extensaun refere la iha baze konstitusional ka legal nu'udar fundamentu hodi extende sira nia mandatu. Portantu Deliberasaun Plenaria hodi halo extensaun ba mandatu Deputadu sira akontese deit bainhira Lejislatura ida nian la'o hela no aplika deit ba Sesaun Lejislativa ninian iha tempu sira resesu no suspensaun nian. La'os extende fali Lejislatura ida ne'ebé nia mandatu hotu ona.

Mandatu Governu nian tuir Konstitusaun artigu 112 n.º 1 alinea a) hatete “Governu hetan demisaun bainhira lejislatura foun hahu”. Signifika Governu depende ba funsionamentu lejislatura ida nian no bainhira lejislatura ida nian mandatu ramata, Governu nia mandatu mos ramata. Tamba Parlamentu Nasional maka hahoris Governu tuir Konstitusaun artigu 106.

Atual Governu ne’ebé bolu Governu de Jestaun lidera husi Dr. Rui Maria de Araujo temi dadauk hodi kontinua halo jestaun. Ho Despaxu Primeiru-Ministru VI Governu Konstitusional nian hodi funsiona Governu de Jestaun ida ne’e. Modelu sira nune’e akontese ona iha Nasaun irmaun sira *Comunidade dos Países de Língua Portuguesa* (CPLP) nian hanesan Portugal iha tinan hirak liu ba no funsiona Governu de Jestaun simu kbiit husi Konstitusaun. Nune’e mos iha kondisaun sira hanesan iha momentu Primeiru-Ministru demite husi nia karguno Governu nia programa seidauk aprova husi Parlamentu Nasional. Iha periodu Governu de Jestaun limite nia kompetensia sira hanesan Governu definitivu no restritamente limite aktu sira ne’ebé nesesariu hodi asegura jestaun negosiu públiku sira.

Iha kazu atual Timor-Leste nian Konstitusaun la temi kona-bá Governu de Jestaun. Maibe Primeiru-Ministru VI Governu Konstitusional Dr. Rui Maria de Araújo funsiona Governu de Jestaun ho nia despaxu rasik. Signifika Governu de Jestaun atual la iha baze konstitusional no legal. Nune’e Governu de Jestaun *fora* husi mandatu ida ne’ebé dadaun ne’e la’o hela fo risku boot liu ba kontratu no akordu sira ne’ebé Governu de Jestaun selebra. Portantu pratika ne’ebé aplika iha Portugal ho baze Konstitusaun no iha mandatu tinan lima nia laran. Maibe Timor-Leste nian funsiona ho despaxu Primeiru-Ministru nian iha periodu *fora* husi mandatu. Iha sentidu ida ne’e, desizaun sira hotu-hotu hasai Governu de Jestaun *fora* husi mandatu no la iha efektu Konstitusional no legal.

## **Rekomendasaun**

1. Prezidente Repúblika hanesan Estadu nia Xefe tenke toma medida Konstitusiona hodi garante Estadu nia unidade no institusaun demokratiku nia funsionamentu regular.
2. Prezidente Parlamentu Nasional III Lejislatura nian agenda ona posse ba Deputadu sira IV Lejislatura.

Atu hetan informasaun kle’an liu kona-bá asuntu ne’e bele kontaktu:

### **Nélson Belo**

Diretor Ezekutivu

Email: [direktor.mahein@gmail.com](mailto:direktor.mahein@gmail.com)

Telemovel: (+670) 78316075 ka 77561184

Website: [www.fundasaunmahein.org](http://www.fundasaunmahein.org)